

## ORDENANZA NÚM. 34

### **LICENZA POLA TENZA DE ANIMAIS POTENCIALMENTE PERIGOSOS, DO SEU REXISTRO E DA SECCION LOCAL DO REXISTRO DE ANIMAIS DE COMPAÑÍA E DA SÚA FISCALIDADE**

#### **EXPOSICIÓN DE MOTIVOS.**

A **Lei 50/1999, do 23 de decembro** sobre o réxime xurídico da tenza de animais potencialmente perigosos, dictada ao abeiro do **artigo 149.1.29 da Constitución Española**, que atribúe ao Estado a competencia exclusiva en materia de seguridade pública, asigna no **artigo 3** aos concellos a competencia para conceder a licenza administrativa que habilite para a tenza de animais potencialmente perigosos. Ademais no seu **artigo 6**, establece que en cada concello existirá un rexistro de animais potencialmente perigosos.

A **Lei 1/1993, do 13 de abril, de protección de animais domésticos e salvaxes en cativeiro** impón no seu **artigo 11**, aos concellos a obriga de recoller os animais abandonados e o **Decreto 153/1998, do 2 de abril** polo que se desenvolve a **Lei 1/1993, do 13 de abril** no seu **artigo 27** obriga a censar a nivel municipal a todos os animais da especie canina así como outros que regulamentariamente se determinen.

Ao abeiro do **artigo 3.2 da Lei 50/1999, do 23 de decembro**, a Xunta de Galicia, aproba o **Decreto 90/2002, do 28 de febreiro** polo que se regula a tenza de animais potencialmente perigosos na **Comunidade Autónoma de Galicia** e se crean os **Rexistros Galegos de Identificación de Animais de Compañía e Potencialmente Perigosos e de Adestradores Caninos**.

En consecuencia, de conformidade coas disposicións citadas e ao abeiro da **Lei 7/1985, do 2 de abril, reguladora das bases do réxime local**, da **Lei 5/1997, do 22 de xuño, da Administración local de Galicia**, a corporación municipal aproba a presente ordenanza.

#### **CAPÍTULO I. DISPOSICIÓNS XERAIS**

##### **Artigo 1. OBXECTO.**

1. A presente ordenanza ten por obxecto a regulación da concesión e renovación das licenzas administrativas para a tenza de animais potencialmente perigosos e a regulación do rexistro municipal de animais potencialmente perigosos.

2. Asemade créase a **Sección Local do Rexistro Galego de Identificación de Animais de Compañía e Potencialmente Perigosos (REGIAC)** que conterá a información referente aos animais de compañía residentes no Concello, que se remita dende o **REGIAC**.

3. Quedan excluídos da aplicación da presente ordenanza os cans e animais pertencentes ás forzas armadas, forzas e corpos de seguridade do Estado, corpos da policía das comunidades autónomas, policía local, e empresas de seguridade con autorización oficial.

##### **Artigo 2. DEFINICIÓN DE ANIMAL POTENCIALMENTE PERIGOSO.**

1. Considéranse animais potencialmente perigosos no ámbito territorial da Comunidade Autónoma de Galicia, todos aqueles que pertencendo á fauna autóctona ou alóctona, independentemente da súa condición, natureza, especie ou raza á que pertencen e convivindo no contorno humano como animais domésticos ou de compañía sexan susceptibles de ocasionar a morte ou lesións ás persoas ou a outros animais ou de producir danos de certa entidade ás cousas.

2. No caso concreto dos cans, entenderanse por potencialmente perigosos aqueles nos que concorran calquera das condicións seguintes:

- a) Cans que tivesen algún episodio de agresións a persoas ou ataques de certa entidade a animais ou a cousas.
- b) Cans que fosen adestrados para a garda e defensa.
- c) Cans que polas súas características raciais puidesen ser aptos para o adestramento para garda e defensa e en concreto, os pertencentes ás razas seguintes: **American Stafforshire Terrier, Pit Bull Terrier, Bullmastif, Doberman, Dogo Arxentino, Dogo de Bordeos, Dogo do Tíbet, Fila Brasileiro, Mastín Napolitano, Presa Canario, Presa Mallorquín (Can de Bou), Rottweiler, Stafforshire Bull Terrier, Tosa Inu, Akita Inu**. Tamén serán considerados neste apartado os cruces en primeira xeración destes, cruces destas razas entre si ou cruces destes con outras razas, obtendo unha tipoloxía similar a algunha das razas anteriormente descritas.
- d) Cans que manifesten unha marcada agresividade natural ou inducida mediante adestramento, malos tratos ou calquer outro medio. A dita agresividade será apreciada pola autoridade competente da Consellería do Medio Natural, de oficio ou logo de notificación ou denuncia e logo do informe dun adestrador ou veterinario designado para o efecto.

## **CAPÍTULO II. DA LICENZA MUNICIPAL.**

### **Artigo 3. LICENZA MUNICIPAL.**

1. A tenza de animais potencialmente perigosos requirirá a obtención con carácter previo á adquisición do animal, da correspondente licenza municipal que se expedirá no concello de residencia habitual do propietario.
2. Nos supostos previstos no **apartado 2.a) do artigo 2º** o titular do can disporá do prazo de 1 mes para solicitar a licenza administrativa, a contar desde a resolución dictada para tales efectos.
3. Nos supostos previstos no **apartado 2.d) do artigo 2º** o Concello comunicará os feitos á autoridade competente da Consellería de Medio Ambiente xuntando os informes esixidos no dito apartado, debidamente motivados. No caso de que se dictase resolución apreciando agresividade, o titular disporá do prazo de 1 mes a contar desde a súa notificación para solicitar a licenza administrativa.

### **Artigo 4. ÓRGANO COMPETENTE PARA A CONCESIÓN DA LICENZA.**

tUnha vez tramitado o expediente conforme ao que se dispón na **Lei 30/1992, do 26 de novembro de réxime xurídico das administracións públicas e do procedemento administrativo común** modificada pola **Lei 4/1999, do 13 de xaneiro**, concederase a licenza e o número correspondente desta, mediante resolución do alcalde-presidente do Concello.

### **Artigo 5. REQUISITOS E DOCUMENTACIÓN PARA A OBTENCIÓN DA LICENZA MUNICIPAL.**

1. Para obter a licenza municipal será necesario o cumprimento dos seguintes requisitos:
  - a) Ser maior de idade. Acreditarase mediante fotocopia do DNI ou do pasaporte.
  - b) Non ter sido condenado por delitos de homicidio, lesións, torturas, contra a liberdade ou contra a integridade moral, a liberdade sexual e a saúde pública, delitos de asociación con banda armada ou de narcotráfico, así como non estar privado por resolución xudicial do dereito á tenza de animais potencialmente perigosos. Acreditarase mediante certificado de antecedentes penais.

- c) Non ter sido sancionado por infraccións graves ou moi graves con algunha das sancións accesorias das previstas no **apartado 3 do artigo 13 da Lei 50/1999, do 23 de decembro, sobre o réxime xurídico da tenza de animais potencialmente perigosos**. Non obstante, non será impedimento para a obtención ou, no seu caso, renovación, da licenza, ter sido sancionado coa suspensión temporal desta, sempre que, no momento da solicitude, a sanción de suspensión anteriormente imposta fose cumprida integramente. Acreditarase mediante certificado negativo expedido pola Consellería do Medio Natural.
- d) Dispoñer de certificado de capacidade física e aptitude psicolóxica para a tenza de animais potencialmente perigosos, expedido polo director dun centro médico psicotécnico debidamente autorizado, conforme se recolle nos **artigos 4º, 5º e 6º do RD 287/2002, do 22 de marzo**.
- e) Ter formalizado un seguro de responsabilidade civil por danos a terceiros que poida causar o animal cunha cobertura mínima de 125.000 euros. Este seguro deberá renovarse anualmente. Acreditarase mediante a presentación dunha copia da póliza de seguro, claramente detallada, ou co certificado da compañía aseguradora.

#### **Artigo 6. VIXENCIA E RENOVACIÓN DAS LICENZAS.**

1. As licenzas terán unha vixencia de 5 anos. Unha vez transcorrido este período deberán ser obxecto de renovación por período de igual duración, mediante a presentación da mesma documentación esixida para á súa obtención e sinalada no artigo anterior.

2. A licenza perderá a súa vixencia no momento no que o titular deixe de cumprir calquera dos requisitos establecidos no artigo anterior.

#### **Artigo 7. ACREDITACIÓN DA LICENZA.**

A tenza da licenza municipal acreditarase mediante a entrega dunha copia da resolución do expediente administrativo iniciado a solicitude do interesado, e mediante a entrega dunha tarxeta acreditativa expedida polo Concello onde se fagan constar os seguintes datos:

- a) Número de licenza municipal.
- b) Data de resolución do expediente de solicitude da licenza.
- c) Data de caducidade da vixencia da licenza.
- d) Nome e apelidos do titular.
- e) DNI do titular.
- f) Enderezo do titular.
- g) Fotografía actualizada do titular.
- h) Selo do Concello.

#### **Artigo 8. REVISIÓN E REVOGACIÓN DA LICENZA.**

1. Calquera variación dos datos que figuran na licenza deberá ser comunicada polo seu titular no prazo de 15 días, contados desde a data en que se produza, ao órgano competente do Concello ao que corresponda a súa expedición, para que se proceda a realizar a revisión correspondente.

2. A perda polo titular de calquera dos requisitos esixidos no **artigo 5º** dará lugar á revogación da licenza municipal outorgada despois de tramitar o expediente contradictorio.

A revogación da licenza dará lugar á perda do dereito á tenza do animal. O propietario procederá no prazo máximo de 15 días a entregar o animal a un novo propietario que posúa licenza en vigor. De non se atopar un novo propietario no prazo referido farase entrega do animal nun centro de recollida de animais vagabundos ou abandonados, respectando en todo momento o que se dispón na **Lei 1/1993, do 13 de abril, e nos artigos 53 ao 60 do Decreto 153/1998, do 2 de abril** que a desenvolve.

### **CAPÍTULO III. DO REXISTRO MUNICIPAL.**

#### **Artigo 9. REXISTRO MUNICIPAL DE ANIMAIS POTENCIALMENTE PERIGOSOS.**

1. Créase o **Rexistro Municipal de Animais Potencialmente Perigosos** no que se inscribirán os animais potencialmente perigosos que teñan a súa residencia habitual no Concello.

2. O rexistro terá un tratamento informatizado no que se farán constar, de conformidade co que se dispón no **artigo 4.2 do Decreto 90/2002, do 28 de febreiro**, como mínimo os seguintes datos:

#### **Datos do animal:**

- a) Número de microchip.
- b) Nome do animal.
- c) Especie.
- d) Raza (no caso dos cans).
- e) Sexo.
- f) Características externas (descrición da capa, tipo e cor da pel, etc).
- g) Data de nacemento.
- h) Aptitude (función do animal):compañía,garda, defensa, caza, etc.
- i) Causa da inclusión no rexistro (sinalar supostos do **artigo 2.2 do Decreto 90/2002**).
- j) Enderezo habitual do animal.
- k) Data de adquisición do animal.
- l) Forma de adquisición do animal(cría,doazón,venda, outras: especificar).
- m) Observacións.

#### **Datos do propietario, ou posuidor:**

- a) DNI.
- b) Apelidos.

c) Nome.

d) Enderezo habitual.

e) Teléfonos de contacto.

f) Licenza administrativa: numero de licenza, data de expedición, e concello de expedición.

3. A identificación definitiva con microchip dos animais potencialmente perigosos é obrigatoria sen excepcións. O Rexistro Municipal de Animais Potencialmente Perigosos é un rexistro de carácter público ao que terán acceso as administracións públicas e autoridades competentes, así como aquelas persoas físicas ou xurídicas que acrediten ter interese lexítimo no coñecemento dos datos obrantes neste. En todo caso, o uso e tratamento dos datos contidos no rexistro será conforme ao que se dispón na **Lei orgánica 15/1999, de protección de datos persoais**.

#### **Artigo 10. INSCRICIÓN NO REXISTRO.**

1. Os titulares da licenza administrativa están obrigados a efectuar a inscrición do animal no rexistro municipal do concello de residencia habitual do animal, no prazo de 15 días contados a partir da obtención da licenza tal e como se recolle no **artigo 6.2º da Lei 50/1999, do 23 de decembro e no artigo 4.1 do Decreto 90/2002, do 28 de febreiro**.

2. Tamén será obrigatoria a instancia do propietario a inscrición do animal no rexistro municipal do concello correspondente cando se efectúe o seu traslado dun concello a outro por período superior a 3 meses.

3. Conforme ao que se dispón no **artigo 4.3 do Decreto 90/2002, do 28 de febreiro** os datos recollidos no rexistro municipal serán remitidos á Consellería do Medio Natural no prazo máximo de 15 días contados desde o momento da inscrición dun animal potencialmente perigoso.

#### **Artigo 11. ACREDITACIÓN DA INSCRICIÓN NO REXISTRO MUNICIPAL DE ANIMAIS POTENCIALMENTE PERIGOSOS.**

A inscrición no rexistro acreditarase mediante entrega dunha copia da resolución do expediente administrativo iniciado a solicitude do interesado e mediante entrega dunha tarxeta acreditativa tamaño carné, expedida polo concello onde se fagan constar os seguintes datos:

a) Número do microchip e data de alta do animal no rexistro municipal.

b) Nome, especie, raza, sexo, capa e data de nacemento do animal.

c) Enderezo do animal.

d) Nome, apelidos do propietario.

e) Licenza do propietario (número, data de expedición, concello)

f) DNI do propietario.

#### **Artigo 12. BAIXA NO REXISTRO MUNICIPAL DE ANIMAIS POTENCIALMENTE PERIGOSOS.**

1. A baixa no **Rexistro Municipal de Animais Potencialmente Perigosos**, efectuarase a instancia do interesado despois de acreditar a morte do animal (esta última certificada por un veterinario ou autoridade competente).

2. Igualmente procederáse á baixa no rexistro no caso de traslado da residencia habitual do animal a un municipio distinto que así quede acreditado a instancia do interesado. Neste caso o propietario deberá dar de alta ao animal no novo concello de residencia.

3. A perda ou subtracción do animal por un prazo superior a 3 meses considerarase baixa definitiva do animal no rexistro.

4. Faranse constar no rexistro como de titularidade municipal aqueles animais depositados nun centro de recollida de animais vagabundos ou abandonados, como consecuencia da recollida destes da vía pública, que carezan de dono ou que sendo este identificado non o reclamase no prazo de 10 días do aviso efectuado, conforme ao que se prevé no **artigo 53 do Decreto 153/1998, do 2 de abril**. Así mesmo, constarán como de titularidade municipal os que fosen obxecto de decomiso definitivo ao propietario.

### **Artigo 13. COMUNICACIÓNS DO PROPIETARIO DO ANIMAL AO REXISTRO MUNICIPAL DE ANIMAIS POTENCIALMENTE PERIGOSOS.**

1. O propietario do animal deberá comunicarlle ao rexistro calquera variación dos datos que figuran nel, no prazo de 15 días desde que se producise a modificación.

2. Deberá comunicarse ao rexistro municipal a venda, traspaso ou doazón do animal.

3. Calquera incidente producido por animais potencialmente perigosos ao longo da súa vida, coñecido polas autoridades administrativas ou xudiciais, farase constar na folla rexistral de cada animal, tal e como se recolle no **artigo 6.4º da Lei 50/1999, do 23 de decembro**. No caso de agresións recollerase, como mínimo, a seguinte información: data da denuncia, descrición dos feitos, e consecuencias xurídicas.

4. A subtracción ou perda do animal, deberá ser comunicada polo titular do animal ao rexistro municipal, no prazo máximo de 48 horas desde que se teña coñecemento destes feitos, tal e como se recolle no **artigo 8.6º do RD 287/2002, do 22 de marzo**.

5. Os propietarios de animais potencialmente perigosos deberán comunicarlle ao rexistro a realización de castración ou esterilización do animal se esta se producise, remitindo copia da certificación veterinaria correspondente que acredite este feito.

## **CAPÍTULO IV**

### **Artigo 14. SECCIÓN LOCAL DO REXISTRO GALEGO DE IDENTIFICACIÓN DE ANIMAIS DE COMPAÑÍA (REGIAC).**

1. Ao abeiro dos principios de lealdade institucional, cooperación e colaboración previstos no **artigo 4º da Lei 30/1992, do 26 de novembro** créase a sección local do **Rexistro Galego De Identificación de Animais de Compañía e Potencialmente Perigosos**, que se nutrirá cos datos remitidos polo **REGIAC**, dependente da Consellería do Medio Natural. Cos datos contados nesta sección formarase a data 31-12 de cada ano o censo ao que se refire o **artigo 27 do Decreto 153/1998, do 2 de abril**.

2. Xa que a identificación definitiva con microchip de todos os cans, independentemente da súa raza ou condición será obrigatoria a partir do **2 de xullo de 2003**, tal e como se recolle na **disposición transitoria segunda do Decreto 90/2002, do 28 de febreiro**, neste rexistro farase constar a información contida no **apartado 5 do artigo 5º** do mencionado decreto.

## **CAPÍTULO V**

### **Artigo 15. CIRCULACIÓN E PERMANENCIA DUN CAN POTENCIALMENTE PERIGOSO EN VÍAS PÚBLICAS E LOCAIS.**

1. Os propietarios, criadores e posuidores deberán manter os animais que estean baixo a súa custodia en axeitadas condicións hixiénico-sanitarias e cos cuidados e atencións necesarios de acordo coas necesidades fisiolóxicas e características propias da especie ou raza do animal, en cumprimento da **Lei 1/1993, do 13 de abril e do Decreto 153/1998, do 2 de abril** en concreto nos seus **capítulos IV, VII, e X**.

2. A presenza de animais potencialmente perigosos en lugares ou espazos públicos esixirá que a persoa que os conduza e controle leve consigo a licenza municipal e a certificación acreditativa da inscrición do animal no **Rexistro Municipal de Animais Potencialmente Perigosos**.

3. Os cans potencialmente perigosos en lugares e espazos públicos, deberán levar, obrigatoriamente, buceiro apropiado para a tipoloxía racial de cada animal.

4. Os cans potencialmente perigosos deberán ser conducidos e controlados con cadea ou correa non extensible de menos de 2 m, sen que poida levarse máis dun destes cans por persoa.

## **CAPÍTULO VI**

### **Artigo 16. CANS POTENCIALMENTE PERIGOSOS ABANDONADOS OU VAGABUNDOS.**

1. A Administración local é a responsable da recollida e mantemento dos animais vagabundos ou abandonados, segundo se recolle no **artigo 11.1º da Lei 1/1993, do 13 de abril, e no artigo 54º do Decreto 153/1998, do 2 de abril**.

2. Os animais recollidos serán trasladados e mantidos en centros de recollida de animais vagabundos ou abandonados autorizados e rexistrados. As instalacións destinadas a albergar cans potencialmente perigosos deberán reunir as medidas de seguridade necesarias para evitar as fuxidas sen producir danos aos animais.

3. Os prazos de estadía previstos serán os que se dan para todos os individuos de especie canina e que veñen reflectidos nos **artigos 53, 57 e 58 do Decreto 153/1998, do 2 de abril**.

4. Estes animais poderán ser cedidos en adopción sempre e cando o novo propietario posúa a licenza administrativa correspondente e o can supere as probas de socialización que demostren que o animal non é perigoso para a seguridade das persoas.

## **CAPÍTULO VII. INFRACCIÓNS E SANCIÓNNS.**

### **Artigo 17. INFRACCIÓNS.**

1. En materia de infraccións e sancións rexerá o que se dispón na **Lei 50/1990, do 23 de decembro, sobre réxime xurídico da tenza de animais potencialmente perigosos** e na **Lei 1/1993, do 13 de abril, de protección de animais domésticos e salvaxes en cativeidade**.

2. As infraccións que se cometan contra o que se dispón nesta ordenanza clasifícanse como moi graves, graves e leves.

3. Terán a consideración de infraccións administrativas moi graves as previstas no **artigo 13.1º da Lei 50/1999, do 23 de decembro**, así como as establecidas no **artigo 220 da Lei 1/1993, do 13 de abril**.

4. Terán a consideración de infraccións administrativas graves as previstas no **artigo 13.2º da Lei 50/1999, do 23 de decembro**, así como as establecidas no **artigo 210 da Lei 1/1993, do 13 de abril**.

5. Son infraccións administrativas leves as previstas no **artigo 13.4º da Lei 50/1999, do 23 de decembro**, así como as establecidas no **artigo 20º da Lei 1/1993, do 13 de abril**.

## **Artigo 18. SANCÍONS.**

1. Infraccións tipificadas no artigo anterior, serán sancionadas con multas con contías que serán as fixadas no **artigo 13.5 da Lei 50/1999, do 23 de decembro, e no artigo 24 da Lei 1/1993, do 13 de abril.**

2. En todo caso, as infraccións graves e moi graves tipificadas no artigo anterior desta ordenanza poderán levar aparelladas como sancións accesorias a confiscación, decomiso, esterilización ou sacrificio dos animais potencialmente perigosos, a clausura do establecemento, e a suspensión temporal ou definitiva da licenza de animais potencialmente perigosos ou do certificado de capacitación do adestrador.

## **Artigo 19. RESPONSABLE.**

Considéranse responsables das infraccións os que por acción ou omisión participaran na comisión destas, o propietario ou posuidor dos animais ou, no seu caso, o titular do establecemento, local ou medio de transporte no que se produzan os feitos e neste último suposto asemade o encargado do transporte.

## **Artigo 20. PROCEDEMENTO SANCIONADOR.**

O procedemento sancionador aplicable rexerese polo que se establece na **Lei 50/1999, do 23 de decembro, a Lei 1/1993, do 13 de abril** así como na **Lei 30/1992, do 26 de novembro** e polas normas que as desenvolven.

## **Artigo 21. EXERCICIO DA POTESTADE SANCIONADORA.**

1. Os órganos competentes para sancionar de acordo cos **artigos 24.2º da Lei 1/1993, do 13 de abril** serán:

- a) Por infraccións leves o alcalde.
- b) Por infraccións graves o director xeral de Conservación da Natureza da Consellería do Medio Natural.
- c) Por infraccións moi graves o conselleiro do Medio Natural.

2. A incoación e tramitación dos expedientes polas infraccións tipificadas como leves correspóndelle ao Concello. Non obstante, o alcalde poñerá en coñecemento, de xeito que faga fe, do director xeral de Conservación da Natureza da Consellería do Medio Natural, toda acción ou omisión que poida ser tipificable como infracción grave ou moi grave.

3. Cando as circunstancias de perigo así o aconsellen o alcalde poderá proceder á retirada ou custodia dun animal potencialmente perigoso a cargo do propietario, como medida de carácter provisional durante a tramitación dun expediente sancionador.

## **CAPITULO VIII. ASPECTOS FISCAIS DA ORDENANZA.**

### **Artigo 22. Obxecto.**

En uso das facultades concedidas polos **artigos 133.2 e 142** da constitución e o **artigo 106 da Lei 7/1985, do 2 de abril**, reguladora das **bases do réxime local**, e de conformidade co que se dispón nos **artigos 15 o 19** en relación co **artigo 20 do Real decreto lexislativo 2/2004, do 5 de marzo**, establécese a taxa por prestación de servizos especiais de expedición de Licenza para a Tenza de Animais Potencialmente Perigosos, o seu Rexistro e Modificacións, así como por inscrición no Censo de Animais de Compañía.

### **Artigo 23. - Feito Impoñible.**



Constitúe o feito impositivo da taxa a actividade municipal conducente á verificación do cumprimento das condicións esixidas polo ordenamento xurídico para a concesión da licenza indicada, renovación, tramitación, control e custodia desta e aqueles outros servizos que se recollen no artigo 27 desta ordenanza.

#### **Artigo 24. - Suxeito Pasivo.**

1. Son suxeitos pasivos da taxa as persoas físicas ou xurídicas que soliciten:

- a) A obtención ou renovación da licenza para a tenza de animais potencialmente perigosos.
- b) A inscrición no rexistro municipal correspondente ou ben a modificación ou cancelación da dita inscrición.
- c) A inscrición no Censo de Animais de Compañía.

2. En particular serán suxeitos pasivos os titulares dos establecementos ou asociacións que alberguen animais potencialmente perigosos e se dediquen á súa explotación, cría, comercialización ou adestramento, incluídos os centros de adestramento, criadeiros, centro de recollidas, residencias, centros recreativos e establecementos de venda emprazados neste municipio, cando soliciten os extremos indicados no número anterior.

#### **Artigo 25. - Responsables.**

1. Responderán solidariamente das obrigas tributarias do suxeito pasivo as persoas físicas e xurídicas a que a refiren os artigos 41 e 42 da Lei xeral tributaria.

2. Serán responsables subsidiarios os administradores das sociedades e os síndicos, interventores ou liquidadores de quebras, concursos, sociedade e entidades en xeral, nos supostos e co alcance que sin alan os **artigos 41 e 43 da Lei xeral tributaria**.

#### **Artigo 26. –Devengo.**

1. O devengo da taxa producirase coa solicitude de calquera dos actos aos que se refire o feito impositivo.

2. A non concesión da licenza, cando non sexa debido a incumprimentos formais do suxeito pasivo, dará lugar á devolución das cantidades autoliquidadas.

#### **Artigo 27º. - Tarifas.**

1. Licenza de Animais Potencialmente Perigosos, 50 euros.
2. Ficha Identificativa Individual, 10 euros.
3. Renovación de Licenzas, 50 euros.
4. Inscrición no Rexistro A.P.P, 10 euros.
5. Inscrición no Censo de Animais de Compañía, 10 euros.
6. Modificacións Rexistrals, 10 euros.
7. Cancelación Rexistral, 10 euros.

Os actos aos que se refiren os epígrafes 1, 3, 4 e 7, cando se soliciten polos suxeitos pasivos a que se refire o **número 2 do artigo 3**, terán unha recarga do 25%.

#### **Artigo 28. - Ingreso da Taxa.**

1. O ingreso da taxa efectuarase nas oficinas de recadación municipal mediante a incorporación da carta de pago ou escrito de solicitude de calquera acto aos que se refire o feito impositivo, e con carácter previo ao acto que o motiva.

2. Os escritos recibidos polos condutos a que fai referencia o **artigo 38 da Lei 30/1992, do 26 de novembro**, pola que se regula o **régime xurídico das administracións públicas e do procedemento administrativo común** que non veñan debidamente reintegrados, serán admitidos provisionalmente, pero non poderá dárseles curso sen que se subsane a deficiencia. Para esta finalidade requirirase ao

interesado para que, no prazo de 10 días aboe as cotas correspondentes co apercibimento de que, unha vez transcorrido o dito prazo sen efectualo, se terán os escritos por non presentados e será arquivada a solicitude.

#### **Artigo 29. - Infraccións e Sancións.**

En todo o relativo á cualificación de infraccións tributarias, así como das sancións que a estas corresponden en cada caso, estarase ao que se dispón nos **artigos 178 e seguintes da Lei xeral tributaria**.

#### **DISPOSICIÓN ADICIONAL ÚNICA.**

Quedan exentos da obriga de obtención de licenza municipal, aqueles exemplares caninos que fosen obxecto de adestramento baixo a supervisión directa de organismos públicos ou privados que utilicen estes animais cunha finalidade social.

#### **DISPOSICIÓN DERRADEIRA.**

A presente ordenanza modificouse mediante a súa aprobación polo **Concello Pleno**, na súa sesión celebrada el **26/04/2018**, entrará en vigor ó día seguinte da súa publicación no BOP de Lugo (18/08/2018), e será de aplicación a partir dese mesmo día, permanecendo en vigor ata a súa modificación ou derogación expresas.